

創建豫南書院考略

地757.15
899



序

昔有宋諸儒聚徒講學自建齋舍設立條規以啟牖後進而書院以興如安定伊川兩先生之禮賢經義等齋象山先生之鸞湖考亭先生之白鹿洞皆其著也嗣是朝廷仿而行之沿爲官制遂與學校並立洎我

朝鄧化覃敷首崇作育凡直省會垣咸設書院

賜帑修建贍給師生膏火俾有志之士入院肄業載在會典遠矣宏規其府廳州縣通都大邑悉聽官紳倡建所以崇文教而振人材輔學校所不逮造士之方莫善乎是嘗考豫中人文之盛以南

汝光爲之最而汝甯之信羅光州之光固尤稱卓卓第士類不齊其學行素優者固不乏人而一二遊惰者流或不免移於習俗然則爲之官長者將欲摩義漸仁使羣歸於正凡屬教養之道苟可以創造興作接武前型而益於治化之源者又烏容已哉光緒戊子壽鏞奉望江 倪豹岑中丞檄權開歸陳許道得替後以廉俸節用之餘積有成款請於 倪公捐作善舉其時未有所需適奉備兵南汝光之

命到官以來考政觀風證之曩日所聞良信其各府州縣之課咸以時舉顧使者向駐信陽舊有申陽書院雖間月一課而規模甚

狹經費未充不足廣資絃誦亟思別開講舍萃三郡生徒而課之如河朔書院之例猝不易獲庚寅夏 倪公簡武來申因以此意白之請將捐存之款作創建資 倪公以爲可是年冬購得董氏舊宅於城南屬州紳陳中翰庭模董其役爲葺頽廢擴規制三閱月而工成卽使者所轄顏曰豫南聘名師爲主講席購經史子集以備研求設學規定章程廣籌經費以期久遠於其成也彙經始之由付之剗厠用志原起惜 倪公道山遽返不及見書院之成所冀都人士之講習於斯者兼求體用繼軌先賢不徒章句詞藻之學而後之分巡而來者觀是刻而瞭然於肇造之模因其已成


二


益所未備庶乎人文日起作邦家光胥於是賴之不惟壽鏞所厚

望抑亦 倪公勤勤政教之素志也夫


光緒十有七年五月豫南備兵使者寶應朱壽鏞謹序


豫南書院圖





山陰縣志卷之五
五
山陰縣志卷之五
圖





碑記

書院之設曷自昉乎古者家有塾黨有庠州有序國有學凡由小成而大成由選士而進士教之以漸升之以次必審其才行素裕然後足備公卿大夫百執事之選故歷代雖有沿革而大經大法類不能或出範圍我

朝文治昌明賓禮隆備儒林嚮化俊乂蒸蒸蓋取士之制既以科目一其趨而課士之方並以官司兼其任是官司責在教養俾人益奮於登進之路則書院實爲初基散者得而萃之沉者得而揚之異等者咸優培之不及者因策勵之擇有道德者爲之師拔

七

有才藝者爲之長亦卽屬民讀法興賢勸能之遺意也豫省府廳州縣書院林立通都大邑絃誦頻聞使者忝任省方舉屬部肄業生徒皆應以時考覈顧政繁地廣殊難周悉靡遺昔賢倡學名山猶爲國家宏作育况乃職業所宜講眾望所專歸乎憶自戊子歲獲權開歸陳許道篆務俸入較豐壽鏞家本儒素自奉儉約度支所餘積有成款當請於前大中丞倪公願悉數捐助善舉以明澹泊夙志尚未有用也適奉備兵南汝光之

命來巡是邦使者向駐信陽舊有申陽書院規模太狹經費未充應課諸生以膏火無多未能踴躍使者間月一課亦不過敷衍塞

責而已庚寅夏 倪公校閱來申請以捐存之款創建書院集三州俊髦而試之一如大梁河朔之例籌給膏火廣購書籍以爲多士觀摩之助 公曰善又商諸同僚共謀集腋僉曰善合前捐之款得銀八千兩有奇是年秋在信陽州治南城內購得董姓住宅一所價銀一千五十兩旁基差隘棟宇半欹適有宅東之劉姓董姓張姓宅南之王姓各以敝宅求售悉購而廣之價銀計六百兩零徘徊審度諸待經營物料未儲苦無端緒且鳩工庀材之任復難其人博訪周諮審聞州紳中書科中書陳君庭模者世守清芬急公好善其才品號爲一鄉冠延之董理初遜謝若未遑也旣知

義弗可辭遂毅然引爲已任以辛卯歲二月初吉開工磚瓦木石之須斤削圻壤之役選求精當督作勤勞雖竹頭木屑未嘗置諸無用允能工歸實際款不虛糜三閱月而一律告成計整新原宅四十二間增修齋舍七十一間器具庖厠惟備又補治街南宅十八間共費銀二千兩零購書已用約五百兩存汝陽黃德聚典生息銀三千兩餘款以備本年脩膳膏火之需尙慮不足仍由 壽鏞捐廉補之落成之日顏曰豫南統屬而罔外也是舉也非 倪公之訓無以策其始非同僚之助無以立其基非陳君之力無以畢其效異日者禮陶樂淑星聚雲從猶得與諸君子俯仰流連快

觀菁莪棫樸之盛惜 倪公道山歸去竟不獲親見其成亦可慨
已雖然事勢變遷何常之有我輩一官如寄久暫難憑政教非旦
夕可期詎克躊躇而滿志則所以折衷往古昭迪來茲者固不敢
苟且自安尤不敢矜張自信也鼓士氣而育人材是所望於後之
在位者矣謹記

學規四則

一敦德行以端本原也德乃修道之基文爲麗德之具根深而後葉茂實至而後名歸是以周禮大司徒三物賓興首明德行如智仁信義中和孝友睦婣任恤皆德行之所表見者也苟於此先虧雖奪席班揚齊驅屈宋有文無行又何取焉凡爾肄業諸生務宜踐履同敦希賢希聖庶不失立教之本意

一勤探討以幾實學也文章經濟固非殊途學者居今稽古豈徒矜揣摩帖括之長擅獵取科名之具已哉蓋必通經致用身體力行然後處不失爲名儒出即可爲碩輔爾諸生窮年矻矻極

深研幾本道購置羣書雖未足應鴻博之需而節採菁華似猶給用如果諸生學業精進一日千里院中藏書不敷攷證本道尙擬隨時添購以爲名山深造之助

一重師友以求夾持也兩漢經術最尙師承唐宋儒修兼資友誼夾持之道自古已然蓋請益而後廣知多聞而後得助書云德無常師主善爲師以言人有專主隨在皆可進德也矧明師在前畏友在後顧容交臂自忽哉本道所聘山長不援聲勢惟取真儒爾諸生北面備禮之誠諒能體本道擁篲式閭之意至同堂共學朝夕追隨賞奇析疑互徵心得亦名教中活潑潑地也

一謹交遊以遵禮法也朋友之義勸善規過爲親仁縱欲狎交爲
比匪其倫紀有虧嗜利唆訟造言生事者并爲名教所不容顧
或三五成羣治遊相逐或酣嬉無度酗酒擎爭以及聚賭挾優
吸食洋煙恣情彈唱之類略非敗子實近下流爾諸生禮法是
程當未甘蹈此蕩檢踰閑之習第本道殷懷過慮殊不能不先
示防維廉恥所存惟在諸生之自審耳

章程十條

一山長必請任院擬定每歲修金壹百六十兩膳敬貳百四十兩共銀四百兩按季致送每節節敬捌兩迎送程儀隨時斟酌監院官一員札委信陽州學正訓導按年輪流管理每節節敬銀捌兩如有事故請假互相代理齋長四人由監院於住院有名之本州舉貢生監中選舉品行端方堪資領袖者充當每人每節酌送銀四兩不在膏火之數如有正經事故請假出院一個月外另行選舉倘辦事不公強霸懶惰以及與人涉訟者立即更換

十一

一住院肄業正課二十名每名每月膏火銀二兩副課二十名每名每月膏火銀壹兩隨課二十名不給膏火以上共六十名永爲定額先咨請 學政將南汝光三郡考列一等生員選送六十名前來肄業其有不到另由本道提取申陽書院舉貢生監以足其數正副隨課仍按每月初二日月課名次升降庶彰賞罰而資勸懲如住院者日去日少再請 學政咨送至逢課期願來投考者另爲酌取不拘名數均作爲額外隨課先由監院登簿記名遇有缺額卽予挨次拔補童生一概弗錄

一每年二月初諏吉開課甄別以後每月仍按初二日首課一文

一詩局門應課限卽日交卷拔取超等二十名卽爲正課除應得膏火外另加優獎特等二十名卽爲副課有膏火無獎賞壹等二十名卽爲隨課無膏火無獎賞膏火於月終由監院分發獎賞隨榜先發十二日課經史詞章算數雜學限五日內交卷拔取不拘名數不能應者聽前列者酌予優獎隨榜分發二十日山長師課不分超特壹等其考取前五名者另予獎賞隨榜分發如無故不應師課卽將本月應得膏火扣除一半首課三次不應黜名倘鈔襲雷同立即斥黜諸生課卷俟榜發各向監院處領回其超取佳作先由監院飭發禮書照繕二份一份

存院以備選刻一份張貼講堂有目共賞

一每年十二月停課如本年住院有名迨次年開課時先期前來者仍予收錄其因歲科考鄉會試而去者事畢同院一併收錄遷延不返不在此例

一額內諸生或因事故或因疾病請假出院者缺額暫留仍予以限制南陽屬不得過兩個月汝光屬不得過一個月限內回院一併依舊逾限不回扣名另補如每月官課師課均能無誤本州人願晝來晚歸者他處人有親友可寄食宿者悉聽其便若不稟知監院無故遠出三日不返卽予黜名至諸生請假出院

其行李箱囊概不許存留院舍以免肇衅

一凡鄉試之年七八九三個月停課先於六月後半月示期決科
一次限卽日交卷過日不收額外有志觀光者并許合同投考
評取超特壹等其額內取列超等者獎予正課膏火三個月取
列特等者獎予副課膏火三個月取列壹等者獎予副課膏火
兩個月卽爲賓興之費其額外取列超等者獎予副課膏火兩
個月取列特等者獎予副課膏火壹個月取列壹等者不獎其
會試舉人准按前一月名次給予三個月膏火以作卷資額內
額外諸生中式者除照發卷資外另給花紅獎勵

十四

一院中所有書籍應立詳細號簿三份蓋用道印一份存道署備
案一份交監院收執一份交齋長收執藏書處另備水牌數面
諸生借閱書籍須告知齋長同往檢取齋長隨筆登記牌面閱
畢卽還銷去牌字或先借半部或先借一冊挨次更換均不得
有意遲留以便輪流共閱如暫時攷證亦須齋長同往檢查隨
手歸架如借鈔需時由齋長轉回監院約計多寡酌限交還只
許閱鈔不許塗抹違者罰賠其非住院之讀書人來求查攷者
并許央齋長同往檢閱雖住院諸生概不得取攜出院倘有散
失惟監院齋長是問

一院中所有各色器具并立詳細號簿三份蓋用道印一份存道署備案一份交監院收執一份交齋長收執均由監院總發齋長按舍勻用不許移借出院卽遇大差地方官前來商借亦不開端倘有偷換暗移之弊諸生咸得與言仍惟監院齋長是問如有損壞齋長隨時回明監院估計工費請款修補不得聽其零落

一院中應設齋夫四名每名每月發給工食錢二千文把門夫一名每月發給工食錢二千文掃地夫一名每月發給工食錢一千五百文均由監院選擇誠實勤謹之人充當各役執司悉循書院定例統歸監院調度齋長亦得呼應其應用禮書卽撥道署科吏二名專司造冊繕文唱名書榜等事每逢課日每名津貼飯食錢壹百文并歸監院處發給至每月所需筆墨紙張顏料油燭以及各項雜費凡課期前由監院彙齊款目覈實開單請領分發毋任浮冒弊混

一住院諸生已於各進安置厨竈公同炊作不得於堂除齋舍處所任意熏污亦不得各置各厨其僱用火夫應由齋長查明來歷轉向監院前具保方令入院所有院中各色人役概不許攜同女眷出入倘或偷取什物作踐房舍及一切過犯查有實跡

本人發州究愆監院難辭責備齋長知覺不先舉發亦有徇隱
之咎

夫